

請諸比丘尼。共住寺中。時長者女。於戒律中。有少毀犯。諸比丘尼。驅令出寺。心懷慚愧。不能歸家。寄住他舍。生大瞋恚。便作是言。我自有舍。止住其中。今者云何。返更驅我。自用住止。即便向彼長者居士。說諸比丘尼種種過惡。狀似餓鬼。不自生活。但仰百姓。使我受身。莫見此輩。作是誓已。其後命終。墮餓鬼中。今得生盲。佛告阿難。欲知爾時彼長者女。出家入道。驅令出寺。惡口誹謗。今生盲餓鬼。是佛說是餓鬼緣時。諸比丘等。各各守護身口意業。厭離生死。有得須陀洹者。斯陀含者。阿那含者。阿羅漢者。有發辟支佛心者。有發無上菩提心者。爾時諸比丘。聞佛所說。歡喜奉行。

四八、長者若達多慳貪墮餓鬼緣

佛在舍衛國祇樹給孤獨園。時彼城中。有一長者。名曰若達多。財寶無量。奴婢僕使。象馬牛羊。不可稱計。時彼長者。值行觀看。到祇桓中。見佛世尊。三十二相。八十種好。光明普曜。如百千日。莊嚴其身心。懷信敬。前禮佛足。卻坐一面。聽佛說法。心生歡喜。還歸辭家。

及諸眷屬求索入道。時諸親屬都悉聽許。還歸白佛。求索出家。佛即告言。善來比丘。鬚髮自落。法服著身。便成沙門。時諸親族及諸人民。以其先是豪富之子。出家入道。競施衣鉢。種種所須。既得之已。生慳貪心。不能施與同梵行者。其後命終。墮餓鬼中。還守衣鉢。時諸眾僧見其去世。開其房戶。欲收尸骸。及以衣鉢闔維羯磨。而此室中見一餓鬼。身如焦柱。狀貌可畏。守此衣鉢。無敢近者。時諸比丘見是事已。往白世尊。具陳所見。於是如來將諸比丘來入室中。語餓鬼言。咄。無慚愧。汝於前身出家入道。貪著利養。不肯惠施。今墮餓鬼受此醜形。汝今云何。不生慚愧。故復還來。仍守衣鉢。呵責慳貪多諸過咎。能令眾生墮於惡道。佛即為其種種說法。心開意解。深生慚愧。即以衣鉢捨與眾僧。於其夜半。便取命終。更受餘形。墮飛行餓鬼中。端正殊妙。著諸瓔珞莊嚴其身。身出光明。照于祇桓。凌虛遊行。與天無異。來詣佛所。前禮佛足。卻坐一面。佛即為其種種說法。心開意解。歡喜而去。於其晨朝。諸比丘等白言世尊。昨夜光明照于祇桓。為是梵釋四天王乎。二十八部鬼神將也。為是他方諸大菩薩來聽法耶。佛告比丘。非是釋梵二十八部諸神王耶。乃是舍衛城中。

大富長者出家入道。近日命終。墮飛行餓鬼中。齋持香花來供養我。是其光耳。佛說是緣時。諸比丘等捨離慳貪厭惡生死。有得須陀洹者。斯陀含者。阿那含者。阿羅漢者。有發辟支佛心者。有發無上菩提心者。爾時諸比丘聞佛所說。歡喜奉行。

四九、餓鬼自生還噉五百子緣

佛在王舍城迦蘭陀竹林。時尊者那羅達多著衣持鉢入城乞食。還歸本處。飯食已訖。搖見祇桓赤如血色。怪其所以。尋即往看。見一餓鬼。脂肉消盡。支節骨立。一日一夜生五百子。羸瘦尪弱。氣力乏少。當生之時。荒悶殞死。支節解散。極為飢渴之所逼切。隨生隨噉。終無飽足。時那羅達多便前問言。汝造何業。獲斯苦報。餓鬼答曰。汝今可自問佛世尊。當為汝說。時那羅達多尋往佛所。前禮佛足。卻住一面。諸佛常法。先意問訊。汝於今者見何異事。那羅白言。向者遊行。見一餓鬼。一日一夜生五百子。極為飢渴。生已還噉。不審世尊宿造何業。受斯報耶。佛告那羅達多。若欲知者。好至心聽。吾當為汝分別解說。此賢劫。